

四庫全書

史部

欽定四庫全書

史部

平定朔漢方略卷十一

詳校官編修臣曹振鏞

編修臣裴謙覆勘

總校官進士臣繆琪

校對官中書臣朱所

謄錄監生臣孫祥鳳

欽定四庫全書

聖祖仁皇帝親征平定朔漠方略卷十

五月丙戌朔定喀爾喀坐位次第理藩院奏言  
奉

旨酌定喀爾喀坐位次序如照給賞之例班列每行  
人數多寡不同應令折卜尊丹巴庫圖克圖土  
謝圖汗扎薩克圖汗弟策旺扎卜車臣汗坐第  
一行扎薩克墨爾根濟農顧祿什希等十四人

令坐第二行扎薩克衛徵諾顏阿玉什等三十  
六人令坐第三行扎薩克台吉西地西里之親  
子丹準多爾濟等七十九人令坐第四行扎薩  
克色稜阿海族弟都默伊爾登台吉等一百四  
十人令坐第五行土謝圖汗同族台吉尼爾喀  
等一百四十人令坐第六行車臣汗之察哈爾  
台吉莽吉代等一百四十人令坐第七行其寨  
桑護衛俱在後環列以坐



上從之尋允伊等所請與四十九旗同列

定喀爾喀引見宴會禮儀先是理藩院遵

旨議定於五月初二日召見喀爾喀等令三跪九叩  
頭排設大宴內外王貝勒貝子公台吉等俱列  
坐於左喀爾喀等俱列坐於右初三日頒

賞宣

訓旨是日衣錦垂纓作樂至是

諭行在禮部曰蒙古人員引見時立進坐次著與領

侍衛內大臣集議議曰詰旦召喀爾喀集於前鋒  
營前序立排案畢使步行而進立於儀仗末引  
進喀爾喀後奏

聞

駕出前坐大臣照常坐地方窄狹後坐大臣應停止  
上曰在前鋒營外下馬序立步行而進如有年老不能  
行者各令其子弟扶掖之又總管內務府等衙門  
奏言初二日宴喀爾喀

宸幄設於網城南門前安

御床取武備院行帳每旁各設兩架當前設帳置案  
排金器照常列儀仗

上出入奏樂其宴各預設於班次宴既備衆集奏

聞

駕出乘馬臨帳升

座理藩院及鴻臚寺大臣官員引導排班聽鳴贊  
傳呼行三跪九叩頭禮行禮時奏樂畢理藩院

大臣官員指示各於其位叩頭坐進

御宴奏樂衆皆起立宴既進樂止繼進茶

上飲茶令喀爾喀齊叩頭飲茶畢撤具繼進酒及酒樽  
獻飲大臣跪奏樂獻酒畢樂止衆皆起隨獻飲  
大臣各於其位跪叩頭執事者以金盃酌酒立  
授獻飲大臣大臣跪受叩頭而飲衆不叩頭畢  
各齊立於其位叩頭坐

上舉宴次第演劇奏樂

賜飲小案待

旨而進喀爾喀等朝見進宴飲酒俱奏鑾儀衛細樂  
其樂設於帳前兩旁宴畢

御筵撤外藩諸王以下台吉他布囊以上及喀爾喀  
聽理藩院大臣鴻臚寺官員引導鳴贊官不傳  
呼行一跪三叩頭禮謝

恩叩頭後按翼排列而立禮部大臣奏宴畢

上還行宮衆俱散奏入得

旨朕出入各蒙古行禮奏鑾儀衛樂進筵飲酒奏內  
監樂餘如所議禮部奏大賚喀爾喀宣

訓諭後令喀爾喀等在網城南門前聽鴻臚寺鳴贊  
傳呼行三跪九叩頭禮

上不必出臨其喀爾喀召集引班之事交理藩院鴻臚  
寺

上是之次日土謝圖汗扎薩克圖汗之弟策旺扎卜車  
臣汗折卜尊丹巴庫圖克圖衆諾顏台吉寨桑

等齊集

上御行宮前黃幄陞座喀爾喀汗諾顏台吉等率衆前  
進行三跪九叩禮按次序坐奏樂演劇衆技畢  
陳大設筵宴其喀爾喀汗諾顏大台吉等俱令  
近

御座前

上親賜酒其餘台吉等皆令侍衛等於坐處送酒

丁亥以宥土謝圖汗罪封扎薩克圖汗之弟曉

諭衆喀爾喀

上欲平息兩翼喀爾喀之事遣內大臣索額圖一等侍衛吳達禪先傳

旨諭折卜尊丹巴庫圖克圖土謝圖汗曰是盟也朕躬與蒙古諸王貝勒貝子公七旗喀爾喀會集爾等可將殺得克得黑墨爾根阿海之事及在喀爾喀非為之事於朕未到之前自陳具奏請罪如不預行奏請倘得克得黑墨爾根阿海之子及衆喀



爾喀訐告汝等之罪朕為天下主可曲宥汝乎宣諭畢折卜尊丹巴庫圖克圖土謝圖汗等奏言

皇上乃統御宇內之元后憐恤臣等欲免其罪當欽遵諭旨而行隨具疏請罪其詞曰扎薩克圖汗得克得

黑墨爾根阿海二人與我衆喀爾喀垂異往投噶爾丹聞彼欲侵取我等土地因而興兵執此二人殺之從此起釁擾害生靈實臣等之罪為此自陳伏乞

皇上睿鑒恩宥至是

上於盟所

諭車臣汗等曰爾七旗喀爾喀皆係兄弟而不相睦  
互吞人民其勢不為仇敵不止朕灼知之特遣大  
臣會閱將所掠人民皆令歸還定誓土謝圖汗違  
誓又稱討厄魯特而興兵執扎薩克圖汗及得克  
得黑墨爾根阿海殺之自此喀爾喀衆志不協國  
破家亡雖困窮已極尚能憶朕舊恩來歸皆已一

體撫養之矣今土謝圖汗等陳奏諸凡大過請罪  
茲於大閱之地按法究處朕心固所不忍而爾等  
七旗輿情亦復何面目乎若以輕罪處之目前皆  
失生業俱賴朕惠養無可復問是以責其大過而  
原其情至扎薩克圖汗亦誠心職貢往來有年無  
故爲土謝圖汗所害殊為可矜如巴郎額爾克阿  
海在即當封之今扎薩克圖汗親弟來朝似宜即  
封之以示優恤爾衆云何喀爾喀汗諾顏大小諸

台吉同奏言土謝圖汗等既知其非而陳情請  
罪已蒙

聖鑒則亦幸矣如果治罪非特

皇上不忍我衆復何顏至扎薩克圖汗人民流散軫恤  
其遺裔欲令策旺扎卜襲封誠非常之舉也我  
衆其何說之辭但不勝感戴仰天祝頌而已

臣謹按孔子有曰知幾其神又曰事豫則立  
蓋未事之前灼見於幾先而豫圖之者誠非

至聖至明未易能也如七旗喀爾喀兄弟不  
和匪朝伊夕迨土謝圖汗構兵攻殺扎薩克  
圖汗等而其讐寔深益不可解我

皇上仁無不覆明無不照稔知喀爾喀交惡之原委情  
事之曲直使不早為之所至會盟時必至紛  
爭既至紛爭則難乎其兩全矣故特遣大臣  
曉

諭折卜尊丹巴庫圖克圖土謝圖汗使自陳請罪而

後集衆會盟渾汗

大號赦過宥愆免土謝圖汗之罪興滅繼絕授策旺  
扎卜之封於是右翼喀爾喀同聲稱慶左翼  
喀爾喀感戴彌殷預燭乎事機使之晏然寧  
息

至聖至明誠負絕乎古今也

戊子

駕臨七溪大閱錫喀爾喀名爵是日

上令八旗滿洲及漢軍火器營總兵官蔡元標下綠旗官兵排列礮火皆

上親自指示

上躬御甲冑大閱軍容畢

御黃幄

賜諸王大臣及衆喀爾喀等茶令侍衛等射有膂力者角觝礮火之聲響震山谷將士進退赫奕威嚴行伍布列整齊壯麗衆喀爾喀等皆畏懼無

不駭愕讚美復

勅諭喀爾喀汗濟農諾顏台吉等曰朕奉承天命統御萬邦欲使率土人民咸獲其所中外竝無異視前以爾七旗喀爾喀人等俱係兄弟互行侵奪吞占人民不相和睦朕特遣大臣會盟諭和而土謝圖汗背棄誓言不從盟議輒自興戎遂為厄魯特噶爾丹所敗以致國亡汗諾顏台吉不能收輯其人民人民不能保有其妻子各自奔潰投入我邊



塞若乘汝等此時窮困之際令我諸部落分行收取爾喀爾喀亦早滅矣朕心本好生不忍坐視汝等滅亡給地安插屢賜米糧牲畜以活之仍畱汗諾顏台吉名號使車臣汗襲位又因汝等下人互相偷盜各增設扎薩克管轄以便督察以汝等向無法度頒行一定律例自古以來未有如此之始終覆育者也朕既活汝欲使倍加長養朕親降諭旨大賚加恩出臨大閱視汝等感戴之情甚為誠

切是以待汝等如四十九旗其名號亦皆如四十  
九旗例以示朕一視同仁之意土謝圖汗車臣汗  
皆留其汗號如故扎薩克圖汗被害實屬冤抑而  
人民離散困窮已極甚為可矜是以授其親弟策  
旺扎卜為和碩親王扎薩克墨爾根濟農顧祿什  
希扎薩克昆都倫博碩克圖滾布扎薩克信順額  
爾克帶青諾顏善巴扎薩克台吉色稜阿海扎薩  
克額爾德尼濟農盆楚克喇卜灘伊等原係舊扎

薩克改濟農諾顏等號俱授為多羅郡王台吉噶爾旦乃土謝圖汗之長子且自枯倫白爾齊爾盟後不時請安是以授為多羅郡王車臣汗叔父扎薩克額爾德尼濟農納木扎爾雖係新扎薩克而勸車臣汗率十萬衆來降其身率先奏請願與四十九旗同列殊為可嘉是以照舊扎薩克例改濟農名號亦授為多羅郡王車臣汗族叔扎薩克額爾克台吉車卜登効力哨探厄魯特捐助私馬不

悞軍務是以授為多羅貝勒台吉西地西里乃土  
謝圖汗之親弟屬裔頗多偕土謝圖汗來降是以  
授為多羅貝勒車臣汗之叔祖車臣濟農車卜登  
達賴濟農阿南達額爾德尼濟農布達扎卜伊爾  
登諾顏達里車臣汗叔父伊爾登濟農盆楚克伊  
等俱係車臣汗之叔祖叔父授為濟農者是以改  
濟農名號俱授為固山貝子白蘇特之察罕巴爾  
諾顏博貝布扎雖係新扎薩克而在喀爾喀時預

奏喀爾喀基業不保其後必壞壞則來歸皇上後  
喀爾喀基業既壞即踐前言來降殊為可嘉是以  
亦授為固山貝子洪俄爾帶青旗分協理旗務台  
吉韓都先衆來降効力被創是以授為鎮國公土  
謝圖汗族中台吉蘇泰伊爾登額爾克帶青諾顏  
善巴族中台吉托多額爾德尼等誠心歸順効力  
行間是以亦授此兩人為鎮國公土謝圖汗之扎  
薩克台吉車木楚克納木扎爾及扎薩克台吉班

珠兒多爾濟扎薩克達爾漢台吉巴郎車臣汗之  
扎薩克額爾德尼阿海車稜達什扎薩克台吉額  
爾克色稜達什扎薩克台吉顧祿扎卜額爾克帶  
青諾顏善巴之扎薩克衛徵諾顏阿玉什扎薩克  
台吉丹津額爾德尼額爾濟根之扎薩克台吉吳  
爾占扎薩克墨爾根濟農索諾木伊思扎卜伊等  
俱授為一等台吉此外有事台吉及其他諸台吉  
應授品級皆諭該部逐一甄叙自茲以後爾等其

仰副愛養之恩各守法度敬順遵行則汝等生計漸滋福流子孫世世蒙恩矣若違法作亂則汝等生計敗壞國法具存凡事必皆照所犯依律處治其各於所屬通行曉諭嗣

頒賜土謝圖汗折卜尊丹巴庫圖克圖扎薩克圖汗弟策旺扎卜車臣汗銀各一千兩及銀器蟒緞綵緞布疋袍帽等物其濟農台吉寨桑等亦按伊等品級從優

頒賜銀兩緞疋等物按伊等品級授其子弟台吉其  
四十九旗王貝勒貝子公台吉等亦按伊等品  
級

頒賜袍帽銀兩有差

諭恩賜親王策旺扎卜坐車臣汗上時

上賜策旺扎卜駝四頭馬十匹羊五十隻又念策旺扎  
卜年幼且所屬人民俱已離散恐致失所令歸  
化城都統副都統等加意護視撫養又



諭尚書班第等曰策旺扎卜雖授為親王而其祖及父素有功績其令策旺扎卜坐車臣汗上

巳丑科爾沁土謝圖親王沙津等率四十九旗王貝勒貝子公台吉他布囊等請上

尊號沙津等奏言伏惟我

太祖

太宗開創以來臣等普蒙

異數悉叨尊顯邇仗

聖上威靈身際隆平人人皆得遂其生矣而七旗喀爾喀土謝圖汗車臣汗人等自古以來尚在化外皇上威福不加稽顙來歸誠為希有之事且厄魯特噶爾丹不自知分量干犯

天兵仰藉

皇威大克其衆誅斬甚多噶爾丹潰亂恐懼立誓而奔以此觀之不日亦如喀爾喀之來降矣更將焉往乎又俄羅斯國之察罕汗亦以一道同軌欽

承

上旨屢思此等

殊猷實

臣

等中心所大快也誠惶誠恐請上

聖主尊號曰德威廣被率土賓服道法光明不可思議  
上治至聖皇帝以大慰中外之望伏乞

睿鑒

臣

等不勝顙望

上曰吳三桂既平之後諸王大臣請上尊號未嘗准行  
此人主所當為之事也前既不允今可許乎其以

此諭王等知之

辛卯

命將軍瓦代等率兵赴土喇

上諭大學士伊桑阿尚書馬齊曰土喇地方應酌量遣  
兵探聽厄魯特人等有不能前去又不能內附者  
收之而來著領侍衛內大臣及內大臣明珠護軍  
統領馬喇與議政大臣集議議曰定北將軍都統  
瓦代等一路護軍內應選擇兵士每佐領各派

出一名及前鋒全隊四百名其管領之夸蘭大  
以下官員令統領大臣量派往土喇偵探厄魯  
特聲息如彼困窮人等不能前往又不能來者  
皆收之而來此所發官兵著於獨石口攜帶兩  
月糧以行兵士瘦馬將所畱兵肥馬易去務使  
人俱得肥馬五匹毋致行路稽遲其統率是軍  
者著定北將軍都統瓦代護軍統領馬喇副都  
統碩代噶爾馬往伊等不諳路徑著帶墨爾根

濟農郡王顧祿什希信順善巴郡王之人前往  
奏入得

旨瓦代等所有火器營兵派發六百名及總管大臣  
以行并著瓦代攜將軍印去

指授護軍統領馬喇等前往土喇事宜時將軍瓦代  
在察哈爾游牧地方馬喇等隨

駕入請

訓旨

上諭曰聞噶爾丹敗遁時有俄里肯之台吉三百許人困極畱住土喇河伊等如欲內附或憚喀爾喀攔阻或力不能來而在彼俱未可定爾等到土喇伊等如在可遣人問故如欲內附爾等收之而來如欲前去則聽之去既不內附又不前去則視其力若遜於爾等爾等相機行事其力大倍於爾等難以舉動則勿輕挑之彼於我有信誓爾等亦以好言曉之非必欲爾等勇於行事也務思其大以圖

全美至爾等行路須嚴設哨探小心防範斷勿懈弛失備其哨卒俱執千里鏡登高而望少懈恐為彼所先窺夜間勿燃火勿喧呼凡所宜禁事件俱務嚴明勿優柔縱法至遇喀爾喀跳脫之人爾等隨力收來各發該主爾等所歷地方詳視記取而行又

諭曰聞布庫他必圖兄弟在克魯倫左近西布退哈灘巴圖爾地方爾等若遇之可諭西布退哈灘巴



圖爾送他必圖兄弟來

命定北將軍瓦代餘兵往安北將軍郎坦軍前先是  
令瓦代等兵出張家口駐正白鑲白察哈爾遊  
牧之地至是兵部奏言會閱事畢除瓦代等所  
率兵外其他兵士應駐何地得

旨除瓦代所率兵外其他兵士俱發往郎坦所  
壬辰會閱事畢

上回鑾是日

上畱尚書馬齊等料理會閱事畢來京又

遣侍郎溫達等往編喀爾喀旗分佐領指授遊牧地

方

癸卯

車駕還京師

乙巳

遣官趣噶爾丹使人起行先是遣副都統蘇黑等攜

噶爾丹使人巴圖爾寨桑諸人往歸化城與察

罕古英寨桑會分為三隊使之起行至是蘇黑  
等報言阿卜都喇寨桑諸人以馬駝羸瘦為辭  
察罕古英寨桑等言噶爾丹遣我等率諸回子  
而來諸回子不去我亦無所往請待尼爾巴噶  
卜楚而行至京城帶來巴圖爾寨桑分為頭隊  
催令起行伊等言諸回子不與我等同往我等  
何以見噶爾丹理藩院奏

聞

上命大學士集議議前遣巴扎爾時有俟草青遣還之  
旨若留厄魯特回子皆待尼爾巴噶卜楚恐致遲久  
應令理藩院遣官一員乘驛而往將巴圖爾寨  
桑達爾漢寨桑滾楚克等合為一隊令與副都  
統蘇黑等曉諭速逐之使行至衆回子言馬駝  
羸瘦請俟尼爾巴噶卜楚等到日同去應將察  
罕古英寨桑阿卜都喇額爾克寨桑等偕來諸  
回子仍交蘇黑等暫留於後俟巴扎爾等到時

再遣之奏入得

旨令員外保柱往餘如議

壬子大學士伊桑阿等率九卿詹事科道等官  
請上

尊號伊桑阿等奏言喀爾喀曩在蒙古素稱不馴雖  
貢獻之使不絕於道而彼諸汗恃其七旗數十  
萬衆未嘗躬脩臣節今仰戴

天威感懷

帝德咸傾心臣服願列屬藩

皇上又念喀爾喀素無統紀罔知禮法其間安輯事宜

賞罰次第非

車駕親臨裁決不能盡善於是

六龍時邁刻期會同喀爾喀土謝圖汗扎薩克圖汗  
之弟及車臣汗率諸濟農諾顏竝台吉等皆伏  
地迎謁會朝如儀

皇上察其誠懇錫宴頒賚極其優渥爰編立旗分與我

四十九旗等惟土謝圖汗車臣汗名號暫令如舊餘則或易王爵或畀貝勒貝子公台吉名銜量功受秩各有差等其他悉照所司分別區處禮成又特降

諭旨重申訓誡明示以守法謹度則福及子孫悖道恣行則身罹禁網既恤其困窮復謀其生計既使之樂育復令其保終興滅繼絕懷柔遠人之道至斯極矣允宜誕膺

尊號垂示萬禩

上曰喀爾喀原係入貢之國伊等不和知其必敗曾特遣大臣諭令和好後乃渝好與厄魯特構戰窘迫來歸屢失生業窮困已極朕以好生之心撫綏養育曲盡周詳因此懇切抒誠願同四十九旗一例蓋理所必然且比年來旱澇頻仍民生猶未蘇息風俗猶未醇厚奢靡猶未盡止朋黨猶未悉除此援引陷害猶未屏絕理應日益圖新時加黽勉



君臣殫心竭力尚恐不逮覲顏以為至治遽受尊號斷乎不可茲所奏已知之矣

六月乙卯朔

遣使賫

勅諭達賴喇嘛

上諭大學士伊桑阿阿蘭泰曰喀爾喀厄魯特諭和之舉朕與達賴喇嘛同行之今已安插喀爾喀使之得所矣應遣使賫勅於達賴喇嘛使人所關緊要

商南多爾濟既病著丹巴色爾濟去

諭達賴喇嘛勅曰朕統御寰區澄清海宇以仁育為  
本撫養是先雖末陞異域之民有困窮而歸命者  
必受而養之使各得其所爾喇嘛奉行佛法廣度  
衆生而救苦難其心亦猶是也前以七旗喀爾喀  
兄弟內相侵奪外與厄魯特交兵朕與爾喇嘛諭  
令罷兵歸好後噶爾丹又追侵土謝圖汗折卜尊  
丹巴庫圖克圖殺奪喀爾喀之人朕遣伊拉古克

三庫圖克圖爾喇嘛遣濟隆庫圖克圖往諭噶爾  
丹朕與爾使人不能仰副朕與爾之心噶爾丹挾  
濟隆伊拉古克三而行稱兵大舉攜其妻子殺掠  
喀爾喀而來深入我邊汛之內劫奪部落人民朕  
稍發兵以問其故反與我兵拒戰至於大敗乘夜  
遠遯此彼來犯我非朕往伐之也彼所行違朕與  
爾好生善念自求窮困而已喀爾喀土謝圖汗車  
臣汗諸濟農諾顏台吉決志入內奏請効力者有

之奏請與四十九旗同列者亦有之呼籲頻仍不  
已朕既已受而養之矣若不自始至終永使得所  
措置安定必致散亡是以刻日於本年四月朕親  
出大閱喀爾喀之汗濟農諾顏台吉等皆執臣禮  
跪而稽顙諄請與四十九旗同列朕設大宴厚賜  
之照四十九旗編為旗隊給地安插土謝圖汗以  
其妄舉興戎陳情請罪朕發衆喀爾喀議之皆言  
加彼之罪則於我衆無光朕是以宥免其罪仍畱

土謝圖汗車臣汗之號又念扎薩克圖汗被殺冤  
痛屬下裔民散亡可矜授其親弟策旺扎卜為和  
碩親王其餘各分等級授以郡王貝勒貝子公台  
吉之銜明其法度昭其典章矣爾喇嘛普濟生靈  
向以喀爾喀國破為憂今已安措喀爾喀使得其  
所遣致爾喇嘛知之爾喇嘛聞此必大歡喜也其  
左翼之喀爾喀無復可議至右翼扎薩克圖汗旗  
下人等被擄散亡有在爾喇嘛所者亦有在他處

者伊等略無罪惡而被擄散亡殊為可矜爾喇嘛  
普濟生靈必能查明發歸原主也今厄魯特人等  
屢有歸降聞噶爾丹窮困已極無食而饑於此可  
見噶爾丹之獲罪於天矣未必不住歸爾喇嘛若  
果往歸作何措置唯爾喇嘛裁之噶爾丹遁去之  
時曾立誓而去倘違誓而稍犯我喀爾喀降人朕  
必發大兵分路前進務期勦滅之其時地方遙遠  
不及遣人賁勅於爾喇嘛亦未可定是以預遣教

習唐古特文喇嘛丹巴色爾濟諭爾知之

命徙巴圖爾額爾克濟農安插四十九旗地方先是  
喀爾喀扎薩克丹津額爾德尼台吉屢奏厄魯  
特巴圖爾額爾克濟農劫其屬裔馬畜等物且  
殺人得

旨發議政大臣集議議曰巴圖爾額爾克濟農前被  
噶爾丹劫掠靡所棲息窮迫來歸我

皇上加恩給地安插乃巴圖爾額爾克濟農不思圖報

皇上覆載之恩反要劫降人喀爾喀丹津額爾德尼人畜什物且復殺人大負

皇上厚恩若巴圖爾額爾克濟農等仍留安插舊居地方亂必不已宜遷至四十九旗地方安插兵部理藩院各遣官一員往發寧夏所備西安滿兵全軍令將軍尼雅漢率之并令總兵官一員酌率綠旗官兵會同前往巴圖爾額爾克濟農所將喀爾喀丹津額爾德尼等被劫人畜什物俱



照數追還尼雅漢等率兵押送巴圖爾額爾克  
濟農至歸化城交將軍郎坦押護內送其起行  
日期即令前去部員一面遣文報部如巴圖爾  
額爾克濟農等不還所奪人畜什物不肯內徙  
安插即令尼雅漢等率大兵勦而滅之奏入

上從之隨遣兵部郎中格什理藩院員外郎二郎保前  
往

辛未

頒賜噶爾丹白金先是差員外郎巴扎爾賚

勅諭噶爾丹徙近邊塞加賞以活之如竟入降益從  
優惠養至是噶爾丹奏言伏蒙遣使降

勅加恩不勝懼忭僻壤諸情總在洞鑒敢直陳之前  
遇大疫今已愈矣馬騎糗糧前曾訴於伊拉古  
克三為之轉奏不及候

旨退歸荒土今使臣賚

勅而來又蒙加

恩益深感激雖未能大為報効請竭力勉圖之奏入  
得

旨噶爾丹請恩誠切著賜白金五百兩

聖祖仁皇帝親征平定朔漠方略卷十

欽定四庫全書

聖祖仁皇帝親征平定朔漠方略卷十一

七月甲申朔郎中格什等奏報巴圖爾額爾克  
濟農遁走格什等奏言臣等至寧夏會同將軍  
尼雅漢等率領西安滿兵全軍總兵官一員酌  
帶綠旗官兵四千因途徑窄隘恐難並驅定議  
將軍尼雅漢親率兵四千出汝吉口往覓巴圖  
爾額爾克濟農副都統栢天郁總兵官馮德昌

等率兵四千出大威口圍截巴圖爾額爾克濟  
農住居西北及到口駐扎之日守口兵報稱口  
外附近居住巴圖爾額爾克濟農人內有四人  
來見拆邊牆即迴馬飛馳而去臣等隨星夜前  
追及之於阿里渾烏素之地令巴圖爾額爾克  
濟農跪宣

聖旨巴圖爾額爾克濟農言我爲噶爾丹所敗來歸  
皇上給臣以賀蘭山陰之地安插皆沐

皇恩得以聊生今將置我等於察哈爾之地值此蝥螬  
交作之時難以遷徙聞大兵來拆邊牆恐將討  
我是以逃避臣等諭之曰大兵之來非討汝也  
因遷移汝等恐途中喀爾喀侵擾兼有盜賊故  
率兵而來乃欲送至歸化城也汝等妄動豈不  
悖哉雖經委曲勸諭而伊等竟不遵

旨臣等隨遣人報將軍將軍親率前鋒及頭隊兵來  
彼一聞聲息即乘馬遁去巴圖爾額爾克濟農

又遣其蘭木扎木巴寨桑鄂木布至將軍所言我等居此遊牧已久復徙至察哈爾地方實爲未便我今往西喇布里圖水上以待將軍明日再請相見也將軍隨遣來使蘭木扎木巴寨桑鄂木布及筆帖式年圖等追及巴圖爾額爾克濟農告之曰我率兵來非征討也因汝等往徙恐途中喀爾喀擾害又有盜賊將送至歸化城也濟農言我來已遠不便回去請在前有水之



地候見語畢即飛馳而去年圖歸告將軍將軍即分兵爲三隊追之追至西喇布里圖日暮將宿臣等言巴圖爾額爾克濟農不從

聖旨不肯遷移而逃當乘夜追及誅之今宿此地次日往追則難及矣將軍不聽次日追三十餘里仍回至西喇布里圖而宿臣等言如此進追何以能及當選人馬星馳電掣庶克有濟將軍復不聽至第三日踰西喇布里圖以外百餘里至庫

克布里圖度不能及遂率兵還將軍查交臣等  
數目所殺厄魯特百餘人俘獲一百二十八人  
馬一百八十匹駱駝四十二頭除兵丁所食牛  
羊外現存牛一百五十八頭羊一萬五千餘隻  
降人噶爾旦多爾濟所屬納木喀班爾蘭木扎  
木巴五十餘戶又有喀爾喀之白蘇忒察罕巴  
爾族弟伊爾登和碩齊格寧兄弟四人率百餘  
戶來降言前者土謝圖汗往征噶爾丹我等投

入土謝圖汗與噶爾丹戰敗逃來察罕巴爾等  
舍我等而先來歸

皇上欲至賀蘭山捕獵近邊覓糧度日居巴圖爾濟農  
所今濟農違

聖旨不肯遷移棄之而走我等何故從彼去乎是以我  
等畱此求歸

皇上冀與我兄白蘇忒之墨爾根濟農索諾木扎卜完  
聚一處安插臣等視巴圖爾額爾克濟農所走

蓋望西而去矣。據此，臣格什往甘州等處地方  
臣二郎保往涼州等處地方探視巴圖爾額爾  
克濟農駐牧之地，奏入得。

旨：議政大臣集議，將安插巴圖爾額爾克濟農原  
由及違。

旨：奔遁情事，著理藩院檄嘉峪關坐探員外本什曉  
諭西海諸台吉郎中格什員外郎二郎保既往  
甘州涼州等處探視巴圖爾額爾克濟農踪跡。

應俟探明時另行議奏伊爾登和碩齊等應着  
理藩院差官令其內徙歸併墨爾根濟農索諾  
扎卜其納木喀班爾等亦令暫住歸化城附近  
地方聽該部酌議安插所俘一百二十八人作  
何安置亦聽該部議奏所獲馬駝牛羊令交遷  
移伊爾登和碩齊人員均勻給還原被劫之喀  
爾喀丹津額爾德尼等至遷移巴圖爾額爾克  
濟農之事前經奉

旨會議檄諭將軍尼雅漢者甚明乃漫不經心延捱  
時日直至十六日方始起行後格什等又遣人  
促尼雅漢等作速進兵而不急往窮追遂爾退  
回應令兵刑二部各差官一員往訊尼雅漢等  
延捱時日失機等情取供到日再議奏入奉

旨此議太輕爲將軍者俱如此違悞指授可乎即遣  
大臣鞠審嗣令刑部侍郎邁圖取口供奏至得

旨下該部議兵部議曰將軍尼雅漢於部檄到日不

即星夜馳赴怯懦稽滯大失軍機應將尼雅漢革去將軍並拖沙喇哈番不准折贖鞭一百副都統栢天郁稽遲怯懦大失軍機應將栢天郁革去副都統郎中格什員外郎二郎保與將軍尼雅漢不能使巴圖爾額爾克濟農不致逃遁未克濟事至巴圖爾額爾克濟農逸逃欲脫其罪推諉將軍尼雅漢深爲不合應將格什二郎保俱革職副都統党古禮病篤不曾往遷巴圖

爾額爾克濟農應無庸議總督格思特係封疆  
重臣部檄到日應即會同將軍尼雅漢等公議  
使巴圖爾額爾克濟農斷不逃遁或擒或殺始  
爲勝任乃於事無濟至巴圖爾額爾克濟農逸  
逃遣大臣往訊始云曾諫將軍尼雅漢巧飾具  
奏殊爲不合應將格思特所加之級不准抵銷  
降二級調用奏入

上曰栢天郁格思特各降五級留任逮將軍尼雅漢至



京擬絞監候格什二郎保革職尼雅漢等率往官  
兵令總督格思特暫轄駐扎寧夏護軍統領馬喇  
補授西安將軍

甲午

命喀爾喀新降之衆暫仍其俗理藩院奏喀爾喀人  
等既與四十九旗同列則衆扎薩克自親王以  
下驍騎校以上凡請

安進貢奏事或遣使或親來俱應照四十九旗例

土謝圖汗車臣汗旗內自王以下驍騎校以上  
凡行事亦應與四十九旗同土謝圖汗車臣汗  
其身僅存汗號應令進九白之貢伊等使人乃  
令照前例至折卜尊丹巴庫圖克圖亦照前例  
奏入得

旨喀爾喀人等初降新行安插俟三年後依此議行  
折卜尊丹巴庫圖克圖亦令貢九白

巳亥

命撤歸化城預備兵

上諭兵部曰歸化城兵無事當撤今值馬肥無事之際著都統郎坦副都統碩鼐於在彼大臣內酌帶一員沿邊直至寧夏延綏西寧往勘大軍可行可止之地至於巴圖爾額爾克濟農前者來歸給地安插而養之助喀爾喀往征厄魯特竟不爲効力且劫奪喀爾喀之事甚多灼知其必不能改故令遷徙居察哈爾之地奈彼素藏禍心是以遠遁彼雖

遁去朕以向加養育初無困之殺之之意欲居何地惟其所擇但不得擾害邊塞地方可令達虎書此原由遣人往諭巴圖爾額爾克濟農著一併議奏議曰今歸化城兵無事應撤但留在歸化城之厄魯特尚未去應每佐領撥護軍二名火器營兵四百名照兵數派官在歸化城週圍暫駐餘俱撤回此所留兵俟歸化城所有頭隊厄魯特起程後即回其陝西調到大同宣府綠旗官兵

亦令各回汛地前解大同宣府之礮仍留大同  
宣府外其馱往輕礮俱令帶回整留大臣伏候  
上命應著達虎抄謄

勅諭遣發巴圖爾額爾克濟農俟彼作何回覆即令  
奏報得

旨着都統喀代李正宗副都統田象坤郎化麟留後  
將軍印交與喀代叅領諾爾孫達米納夸色蘇丹  
古爾哈亦着與郎坦偕往着乘驛去勘視地方既

畢着郎坦等一二緊要之人乘驛先來入奏後郎坦等勘回復奏言

皇上所指諸地大軍行止無不允當

壬寅將軍瓦代奏報回軍瓦代等奏至克魯倫遇西卜退哈灘巴圖爾納木扎爾托音伊等俱願來投鄂理肯等遍訪無踪哨探噶爾丹信息遁去已久遂於本月初四日回軍十八日進翁俄羅喀倫將入獨石口

丙午土謝圖汗請給腴田耕種土謝圖汗奏蒙  
皇上仁恩臣與子及所屬人民不勝懼忭今思得一膏  
腴種植之地使我人民一二十戶出力相助春  
耕以資朝夕伏乞

鑒恤

上曰來年春理藩院遣官一員指授膏腴之地令其種  
植

閏七月丙辰總督格思特奏報總兵官柯彩出

邊勦殺厄魯特格思特奏言甘肅總兵官柯彩  
呈稱副將陳祚昌等奉差哨探至昌寧湖見廬  
帳有五百餘不知蒙古人數職即調集官兵出  
邊征勦濟農之弟博吉遣格隆等數人來見言  
我博吉乃善人並不敢背負

皇恩欲假道以詣南山如不遣往請在昌寧湖牧馬職  
言汝既云不負

皇恩當遵



聖旨護送汝等至歸化城答以我牲畜皆疲決不能往  
職查奸獍博吉借名牧馬緩我軍機密通西海  
諸蒙古以相救援今欲往西海其情顯然矣若  
不勦除終爲後患一面將來差格隆監禁一面  
報臣又據總兵官報博吉所屯昌寧湖乃邊外  
野地離邊一百二十餘里甚爲遼濶且林木茂  
密易於藏匿必四路進勦乃可滅此狡寇隨遣  
提標前營遊擊李士達等率官兵一千從南方

路入本標左營遊擊常應龍等率官兵八百從  
東南方路入本標後營遊擊杜思順等率官兵  
八百從西北方路入鎮番叅將張文輝等率官  
兵四百從東北方路入職與

欽差員外郎二郎保居中督勦分頭前進蒙古放鎗  
迎敵我官兵奮勇力戰大敗蒙古殺五百餘獲  
傷者甚多生擒蒙古十五人博吉入林遁走又  
隨遣官兵躡踪撲殺追百餘里天晚昏黑不可

深入收兵回營所獲蒙古牲畜器械查明另報  
其前監禁蒙古額林辰索諾木者乃博吉之親  
弟親子格隆者乃親信之喇嘛是以併生擒蒙  
古俱行斬訖捷報到臣查博吉乃濟農之弟  
在賀蘭山三百里中衛邊外牧馬濟農逃遁時  
不及同去即往昌寧湖見我官兵有備自揣難  
脫是以遣其子弟格隆緩我軍機以冀潛逃雖  
總兵官柯彩率兵出邊征勦蒙古實藉

皇上神威遠播官兵奮勇之所致也奏至得

旨總兵官柯彩出邊籌畫遣發官兵分頭前進勦殺

厄魯特人衆可嘉在事人員著議叙以聞

已未嚴打箭爐貿易之禁達賴喇嘛疏言竊思

博碩克圖汗往追折卜尊丹巴恐有乖

皇化乞遣回折卜尊丹巴土謝圖兩人不使及於惡前

此所言非善巴陵堪布所私奏也實仰體

聖主之心自厄魯特喀爾喀以及衆生俱令之共享昇

平也如有不合祈

睿鑒勿責至我打箭爐以外和占昌珠蘭等處前違  
法興兵大爲擾害恐不當

聖心故不遣此地蒙古其打箭爐兩間之地雖奉有着  
照前行之

旨字係蒙古文漢人不識祈以漢文降

勅奏入下所司議理藩院議康熙二十八年十二月  
達賴喇嘛使人善巴陵堪布來口奏伊等起行

之前曾往達賴喇嘛所不令面見使立於達賴喇嘛所居戶外諦巴出謂伊等曰達賴喇嘛令汝奏

聖上乞擒喀爾喀土謝圖汗折卜尊丹巴庫圖克圖授厄魯特噶爾丹博碩克圖庶於生靈有益若此兩人之命我當保之其奏詞奉

旨存案今達賴喇嘛奏乞遣回折卜尊丹巴土謝圖兩人勿及於惡等語非善巴陵堪布之所私奏

應無庸議前者康熙二十九年達賴喇嘛因大  
兵威力勦滅逆賊吳三桂衆皆歸化爲良民請  
於打箭爐地方互市曾許以地方平定之後照  
常貿易今達賴喇嘛以蒙古文漢人不識請以  
漢文降

勅諭令照前行事應檄該省督撫提鎮打箭爐貿易  
勿得生事擾亂併檄諭達賴喇嘛嚴禁其所遣  
貿易人等勿得妄行生事

上從之

命定火器營賞例兵部以八旗火器營兵丁擊敗噶

爾丹之功議叙具奏

命議政大臣大學士八旗滿洲蒙古漢軍都統副都

統集議議曰火器營兵排齊鹿角而戰不得與騎

兵相同在本旗之前先進者有上等次等三等

之別若臨陣放鎗之衆兵丁向無一概議叙之

例然不議叙又無以鼓勵軍士是以將列陣形



勢問之總管火器營都統諾邁等俱言齊排鹿角每架撥什庫一人身帶小旗立於前其餘兵丁一一調進撥什庫指示放鎗接戰次執大纛兵丁亦立而不動此兩種人最爲緊要至烏鎗手一齊接戰似應一概議賞查火器營帶小旗之撥什庫及執纛之人旣屬緊要則此交戰撥什庫等應各賞銀二十兩執纛之人賞銀十兩向無兵丁一概議賞之例則概行給賞之處無

庸置議嗣後如仍排鹿角攻戰其戰功若以上  
上等議叙則帶小旗之撥什庫各賞銀三十兩  
執纛之人各賞銀二十兩若照此番軍功上等  
議叙則帶小旗之撥什庫各賞銀二十兩執纛  
之人賞銀十兩以軍功次等議叙則帶小旗之  
撥什庫賞銀十兩執纛之人賞銀五兩以軍功  
三等四等五等議叙則一概不算若不用鹿角  
八旗騎兵與火器齊列擊敗對陣敵人則與騎

兵相同在本旗大纛之前先進三人俟將軍大臣開冊送部照前進之例議叙又一議以爲火器營兵一齊接戰

聖諭之所洞鑒似應將鎗礮兵丁酌量一概議賞此番火器營放礮放鎗之人執纛之人帶小旗之撥什庫押礮披甲共二千九百七十七人應交戶部給賞又挽車步甲一百一人綿甲五十八人擡鹿角僕人五百七十九人共七百三十八人

皆原文未開相應停給得

旨放鎗礮之人着一概賞銀二兩著爲令挽車步甲  
綿甲擡鹿角僕人俱賞銀一兩

九月丙辰

遣官督視噶爾丹使人啓行噶爾丹使人阿卜都喇  
寨桑察罕古英寨桑等訴稱前聞尼喇巴噶卜  
楚以九月到其時令我等同歸今尼喇巴噶卜  
楚或已亡故或竟不來我等豈能久待理藩院

據以奏

聞

上諭員外郎鐵圖乘驛往歸化城會副都統阿迪督視  
啓行

丁卯達賴喇嘛陳情請罪先是以噶爾丹敗遁  
之後懼我各路大兵堵禦請罪盟誓情節遣伊  
什格隆賁

勅往諭達賴喇嘛至是達賴喇嘛疏言前者敬遵

諭旨曾遣噶爾亶西勒圖往和喀爾喀厄魯特值生  
靈有災之時至於敗亂不當

皇上之心不能遂我初願凡諸

諭旨皆是愛養喀爾喀離散之人誠

聖天子之洪仁也噶爾丹作亂追索折卜尊丹巴諸人  
而濟隆不能說止實爲非是濟隆報文言已竭  
力諭和兩家聽從立誓矣及見

皇上有噶爾丹敗遯俯念衆生止勿窮追噶爾丹認罪

立誓之

旨始知其實厄魯特不聽訓飭是以此地所遣人員有無知無識之處伏乞

寬宥又使人德木本爾囊素述達賴喇嘛口奏之言云喀爾喀厄魯特交戰之前土謝圖汗噶爾丹等遣使於西海台吉各請助兵達賴台吉來告於我我謂喀爾喀厄魯特皆我護法施主爾等和睦我則喜悅不得有所偏助也時於四川所

屬打箭爐等地方令西海扎什巴圖爾台吉領  
兵駐防非有異念也其戍兵已早撤歸矣奏入  
上以達賴喇嘛向來恭順噶爾丹事差員及近侍通同  
蒙蔽非達賴喇嘛意也應賜勅諭之

勅曰爾奏噶爾丹作亂追索折卜尊丹巴等諸人而  
濟隆庫圖克圖不能說止實爲非是濟隆報文言  
已竭力諭和兩家聽從立誓矣及見皇上有噶爾  
丹敗遁俯念衆生止勿窮追噶爾丹認罪立誓之



旨始知其實厄魯特不聽訓飭是以此地所  
遣諸人有無知無識之處伏乞寬宥朕統御宇內  
以愛育黎庶爲本務使萬邦共享安樂前聞喀爾  
喀厄魯特交惡相攻屢遣使於爾喇嘛以和兩國  
爾喇嘛從來奉命不違敬順而行亦屢遣喇嘛說  
和奉差喇嘛諸人若能仰體朕與爾好生之意盡  
心行事則使喀爾喀厄魯特和好早息戰爭皆不  
至滅亡矣但爾近侍與濟隆庫圖克圖等皆有私

意不體朕與爾之心濟隆庫圖克圖身在噶爾丹營中並不說和噶爾丹藉追喀爾喀爲名闖入邊汛劫掠烏朱穆秦諸地又不勸阻且噶爾丹與我軍交戰濟隆張蓋於山頂觀之況濟隆並未說和而報爾以爲竭力說和聽從立誓濟隆之去朕面諭以告爾喇嘛之旨亦不行傳諭以前項事情揆之未必濟隆一人之意如此行事也爾近侍之人通同貪利而欺蔽汝狗庇噶爾丹之所致也爾豈

有如是之心乎朕灼見於爾喇嘛無涉是以朕不  
責汝朕與爾之心向來合一故將若輩行事違朕  
與爾之意遣勅使爾知之至噶爾丹乞兵於達賴  
台吉而不許駐防四川屬下打箭爐之兵盡撤已  
具悉所奏矣此勅交與來使德木本爾囊素賁去  
辛巳

授土謝圖汗養子濟克巴等爲四等台吉時土謝圖  
汗以伊養子濟克巴乳母之子多爾濟扎卜阿

必達伊妻乳母之子車陵蚌乞授職銜理藩院  
議以非例不准

上曰土謝圖汗懇請誠切授濟克巴多爾濟扎卜阿必  
達車陵蚌俱著爲四等台吉勿爲例

十月乙酉

命發鄂爾多斯諸旗兵預備

上諭侍衛阿南達曰朕思黃河冰凍之時恐有巴圖爾  
額爾克濟農等流兵至我西邊喀爾喀地方應令

鄂爾多斯吳喇忒喀爾喀之墨爾根濟農郡王顧  
祿什希額爾克帶青郡王善巴公託多額爾德尼  
人等於冰解以前備之且以探信着理藩院諸臣  
會同詳議具奏議鄂爾多斯六旗一百七十二佐  
領內應令撥兵三千吳喇忒三旗三十佐領內  
應令撥兵五百扎薩克信順郡王善巴扎薩克  
公託多額爾德尼扎薩克台吉圖巴丹津額爾  
德尼此四旗四十二佐領內撥兵五百又扎薩

克墨爾根濟農郡王顧祿什希扎薩克公蘇泰  
伊爾登扎薩克台吉墨爾根帶青車陵此三旗  
二十四佐領內撥兵五百令所撥兵各備於其  
地台吉都統副都統等管轄人員俱量兵數選  
擇材幹善約束者派出其鄂爾多斯貝勒宋喇  
卜扎薩克信順郡王善巴扎薩克墨爾根濟農  
郡王顧祿什希此三路每處撥官二員駐於適  
中之地探信其管兵人員即令前去部員閱發

有事則一面報部一面酌量調兵應援其總統  
三路兵之大臣伏候

上裁得

旨所議發兵甚善著阿爾尼吉爾他布諾木齊代馬  
廸達賴英古巴扎爾畢雅思呼朗等去仍令阿爾  
尼吉爾他布主之伊等前去一切俱便宜行事

丁未提督孫思克奏報區處阿齊羅卜臧等劫  
奪之案先是遣侍讀學士達虎賁

勅頒賞策旺喇卜灘阿奴等偵探噶爾丹與彼等交惡情節歸至嘉峪關外被阿齊羅卜臧等劫奪兵部檄令孫思克遣人諭羅卜臧等查劫侍讀學士達虎及殺傷官兵之蒙古應正法者正法應償還者償還如仍抗拒即行勦滅至是孫思克奏言阿齊羅卜臧者乃西海蒙古同族之人臣撥發官通各遣人於西海善圖墨爾根台吉等頭目令阿齊羅卜臧追取原劫牲畜等物不



意阿齊羅卜臧遠逃催追不獲衆蒙古頭目雖  
各認請待草青再行追取臣思阿齊羅卜臧未  
必從衆台吉之言臣酌議於勦滅噶爾丹之後  
視阿齊羅卜臧游牧之遠近再請

旨勦殺奉

旨依議今西海善圖墨根台吉等差人解還阿齊羅  
卜臧所奪

欽差官牲畜器械問之來差蒙古答曰阿齊羅卜臧

劫

欽差官員一案我衆台吉奉

聖旨各差寨桑追取阿齊羅卜臧牲畜我等追得阿齊  
羅卜臧馬三十二匹駱駝二十八頭盛甲十四  
副烏鎗八桿撤袋十三副刀十六口弓二十張  
故衆台吉差我等解來竊思阿齊羅卜臧乃兇  
惡無知之人去年狂妄橫行忽劫

欽差官員逆天之罪法所宜誅但臣前者撥發官兵

殺校部四百餘騎獲馬駝牛羊千數以示

國法情罪亦略相當所劫馬駝盔甲等物理合照  
數追取臣奉部文遣官通於西海蒙古頭目衆  
台吉宣布

國威陳說利害令伊等往追西海衆台吉遣人於  
阿齊羅卜臧游牧之地追取馬駝器械等物雖  
不及原數但西海蒙古衆頭目差人言阿齊羅  
卜臧自劫

欽差官員以後人逃牲斃貧苦已極儘其所有追取  
解來先所劫牲畜物件俱已費盡其餘實不能  
追又再三求臣代奏

皇上請免此特畏懼

天威求免日後之覈查也

恩出

皇上非臣所敢擅議至所劫營馬先以茶馬補給兵丁  
所劫盛甲以臣標裁兵所剩盛甲撥發令蒙古

解還馬三十二匹留臣標營內喂養待有倒斃  
馬缺補給追來盛甲十四副亦貯臣標營內待  
兵丁缺甲撥發至追來烏鎗弓箭等物乃兵丁  
自置之物仍給肅州營兵外其賠解駱駝二十  
八頭已非原物皆老而瘦小先是達虎等出邊  
帶去馬駝乃動支官庫採買者應將蒙古賠解  
駱駝交與地方官估價償庫亦於原項有小補  
也得

旨孫思克此事區處極當一切邊務盡心籌畫効力殊爲可嘉本內事俱如議

十一月戊午

授札薩克圖汗之子克色克爲輔國公札薩克圖汗之妻布尼達喇奏言

皇上出臨會閱我與我子巴郎二人望塵赴會欲訴先祖父名爵及我汗身命被害兩大事而巴郎倏爾身故續欲率其弟功格台吉以往而又病歿

屢遭變故不獲赴會今因札薩克圖汗身命被害及名爵之事迫欲叩陳攜六歲之克色克台吉而來寡婦孤兒惟

聖上鑒恤此外他無所望奏入得

旨下所司議理藩院奏言今年會閱折卜尊丹巴庫圖克圖土謝圖汗等攻殺札薩克圖汗德克德黑墨爾根阿海之事已降

勅寬宥其罪札薩克圖汗之位已封其弟策旺扎卜

爲親王矣且克色克年幼未及應授封之時所  
奏扎薩克圖汗身命被害及名爵之處俱無庸  
議奏入

上曰扎薩克圖汗被殺殊爲冤抑所存止此一子克色  
克從優授爲輔國公

癸亥

命西安官兵移駐寧夏

上諭兵部曰陝西西安鳳翔所屬今年米穀無收特遣



學士布喀往勘今據回奏米價騰貴供應駐防官  
兵糧料採買累民聞甘肅巡撫所屬地方米穀有  
收應將西安官兵於收麥以前暫行移駐寧夏則  
西安供應有餘亦於民有益爾部會同戶部核議  
具奏議西安滿兵漢軍內應撥四千兵往駐寧夏  
官則量兵遣發着該將軍總督相視寧夏等處  
指出何地有糧暫於收麥之前駐守此兵原係  
閒住應將常給馬匹草料三分中減去一分此

所移駐官兵僕從口糧馬匹草料既在現住地  
方支給則西安應停支給僅於所存人口給以  
口糧至所餘住居西安之官兵馬匹應支草料  
亦應減半支給俟收穀時照常給發如此則採  
買糧料實爲有益至統率此兵前往者於將軍  
副都統內請

旨點定得

旨令將軍馬喇帶去

丁卯

命定從征迷失人等給身價例先是西安披甲額卜特大小子因覓馬迷失兵部將署叅領葉黑布等擬罪具奏得

旨嗣後出兵迷失者作何給與身價併議定例具奏至是兵部奏言葉黑布格美皆管兵夸蘭大叅領而甲兵額卜特大小子遺失馬匹往覓不歸不即稟知大臣發官兵追尋越五日始言於理

不合應將佐領署叅領葉黑布降二級調用拜  
他喇布勒哈番兼佐領署夸蘭大格美降一級  
調用但格美有拜他喇布勒哈番之職無級可  
降應罰俸年半免其調用甲兵額卜特大小子  
迷失不獲其尸應照陣亡例給與身價葉黑布  
格美怠玩已甚應將額卜特大小子身價銀兩  
於葉黑布格美名下追給驍騎校署散騎校瓦  
爾達係管馬之兵丁遇額卜特大小子既不收

留又不遣人送回本軍應將瓦爾達罰俸一年  
嗣後行軍之地兵丁有迷失者治罪及追給身  
價俱照此例編入條例遵行

命下之日通行八旗包衣佐領及官兵駐防奉天等

處奏入

上從之

聖祖仁皇帝親征平定朔漠方略卷十一

欽定四庫全書

史部

平定朔漢方略卷十三

詳校官編修臣曹振鏞

編修臣裴謙覆勘

總校官進士臣繆琪

校對官中書臣朱烜

謄錄監生臣汪緣

欽定四庫全書

聖祖仁皇帝親征平定朔漢方略卷十二

康熙三十一年二月辛卯西安副都統馬自德

請赴寧夏軍前自德疏言臣幼時即蒙

皇上養之恩歷有年所今新任滿洲副都統阿蘭泰

傳

諭滿洲副都統西爾哈達速赴將軍軍前竊思臣身

現在陝省且寧夏亦有漢軍官兵理宜往赴寧



夏請

命前往庶得馳驅邊塞少効微勞矣

上許之

乙丑侍衛阿南達奏報巴圖爾額爾克濟農降  
先是

上諭大學士伊桑阿阿蘭泰等曰頃有喀爾喀杜稜逃  
來言彼向在巴圖爾額爾克濟農之弟博濟所博  
濟經我兵掩殺徒步逃出至伊巴賴之地遇巴圖

爾額爾克濟農屬下祁齊克台吉等博濟取彼馬  
及糧糗往覓其兄巴圖爾額爾克濟農食盡困極  
自相竊奪現在厄濟內地方厄濟內之地距嘉峪  
關四日程云目下西安大兵正往戍寧夏可令侍  
衛阿南達携杜稜至寧夏會同將軍馬喇提督孫  
思克及總兵官等詳議確探聲息如巴圖爾額爾  
克濟農彼所居果近嘉峪關二郎保格什現在彼  
地可即遣伊等前往招撫如抗拒不降即選發滿

洲綠旗兵勦除之至是侍衛阿南達等奏報巴圖

爾額爾克濟農降

上諭議政大臣蘇爾達等曰覽侍衛阿南達等奏報巴圖爾額爾克濟農已降將遣其子來朝但其人未可深信或時序不宜馬匹羸瘦不得已而降令其子來朝往返之際馬匹休息又復遁逃亦未可定將軍馬喇提督孫思克等既身與逼近目擊情形宜乘此機會共商徙入內地之策斷不可縱使復

逸尋馬喇等奏至言濟農下人共二千二百餘口  
今雖絕糧窮困已極然臣等揆其情狀亦不爲  
此誠以

皇上鴻恩浩蕩不敢背棄卽醜類色稜扎木素等亦禁  
戢其下未嘗使窺邊塞兩次遣人陳情雖不能  
上達仍望

皇上降旨收納是以臣等招撫之文甫到卽不疑而來  
降以此觀之不可謂之不向

聖化者也又查其弟姪博濟等諸台吉及屬下離散之人俱在西海地方今所存不過六七百人且復受巴圖爾額爾克濟農之降關繫遠人視聽

皇上懷柔遠人仁聲遐播不得不議所以保全之是以曉諭地方官各隨宜捐助糧米給食至寧夏其步行人千餘內有不能行者四百人撥內地驢車遞送若巴圖爾額爾克濟農本身將其下色目五十餘人與臣馬喇親從口內同帶往寧夏

必不使之再逃既至寧夏亦不問其願否即令渡黃河彼亦無可如何矣但困窮已極倘不給之糧騎實不能至歸化城伏乞

勅部遣官至黃河之寧夏渡口按人給騎計口授糧令鄂爾多斯遞送即可至歸化城如此則寧夏地方不必撥官兵押送矣奏入

命理藩院遣官一員至寧夏使巴圖爾額爾克濟農少攜僕從乘驛而來沿途酌撥綠旗兵遞送俟朝

見後遣歸後巴圖爾額爾克濟農率其子雲木春

台吉至京

朝見

優賚而遣之

丙寅

命加提督孫思克太子少保並賜拜他喇布勒哈番  
上諭兵部曰國家簡用武臣委任封疆重寄專期軍民  
輯睦邊境乂安其實有宣力累年茂樹偉伐則旌

庸之典必加渥焉甘肅提督孫思克久歷邊地熟諳機宜當秦省用兵之時素著勞績自任提督以來益殫謀猷實心幹濟惠愛洽於士卒威望聳乎外彝特霈殊恩用昭寵獎著加太子少保給一拜他喇布勒哈番以示朕展勲酬勞至意

癸酉

命原任郎中格什等仍留哨探侍衛阿南達等疏言今巴圖爾額爾克濟農既降諸事已畢請撤回



郎中格什等得

旨本什偵探日久著回京命格什二郎保代彼駐扎  
偵探

五月癸酉

頒喀爾喀衆扎薩克印理藩院奏喀爾喀既與四十

九旗同列應照四十九旗例給與印信請將土

謝圖汗車臣汗及親王策旺扎卜三部落分爲

三路土謝圖汗部落爲北路喀爾喀車臣汗部

落爲東路喀爾喀親王策旺扎卜部落爲西路  
喀爾喀以土謝圖汗管北路中軍事扎薩克墨  
爾根濟農郡王顧祿什希管北路左翼中軍事  
扎薩克信順郡王善巴管北路右翼中軍事昆  
都倫博碩克圖郡王滾布管北路中左軍事扎  
薩克貝勒西第西里管北路中右軍事扎薩克  
公蘇泰伊爾登管北路中前軍事扎薩克公托  
多額爾德尼管北路中後軍事扎薩克公汪舒

克管北路左翼左軍事扎薩克台吉車木楚克  
納木扎爾管北路右翼左軍事扎薩克台吉丹  
津額爾德尼管北路左翼右軍事扎薩克台吉  
班珠兒多爾濟管北路右翼右軍事扎薩克達  
爾漢台吉巴郎管北路左翼前軍事扎薩克台  
吉衛徵諾顏阿玉璽管北路右翼前軍事扎薩  
克台吉李塔爾管北路左翼後軍事扎薩克台  
吉薩木濟忒管北路右翼後軍事扎薩克台吉

墨爾根帶青車陵管北路左翼下軍事扎薩克  
台吉土巴管北路右翼下軍事以車臣汗管東  
路中軍事扎薩克額爾德尼濟農郡王納木扎  
爾管東路左翼中軍事扎薩克額爾克貝勒車  
卜登管東路右翼中軍事扎薩克額爾德尼濟  
農貝子布達扎卜管東路中左軍事扎薩克伊  
爾登濟農貝子彭蘇克管東路中右軍事扎薩  
克達賴濟農貝子阿南達管東路中前軍事扎

薩克車臣濟農貝子車卜登管東路中後軍事  
扎薩克伊爾登濟農貝子達里管東路中下軍  
事管理洪郭爾帶青旗務公慙都管東路左翼  
前軍事扎薩克額爾德尼阿海台吉車林達什  
管東路左翼後軍事扎薩克額爾克台吉塞稜  
達什管東路右翼後軍事以親王策旺扎卜管  
西路中軍事扎薩克郡王色稜阿海管西路左  
翼左軍事扎薩克額爾德尼濟農郡王彭楚克

喇卜灘管西路右翼左軍事扎薩克察罕巴爾  
諾顏貝子博貝管西路右翼右軍事扎薩克台  
吉額爾德尼哈灘巴圖爾滾占管西路左翼前  
軍事扎薩克車臣台吉吳爾占管西路右翼前  
軍事扎薩克墨爾根濟農台吉索諾木伊思扎  
卜管西路左翼後軍事扎薩克台吉額爾德尼  
滾布管西路右翼後軍事俱各授之印信奏入  
得

旨土謝圖汗車臣汗暫停給印餘如議

六月己丑

命遷喀爾喀羅卜臧賽音台吉暫駐歸化城周圍地方先是

上諭侍讀學士達虎曰聞羅卜臧賽音台吉在西寧欲來而不能來此乃歸降於我之人殊為可憫著交與所司理藩院議羅卜臧賽音台吉不能前來臣衙門差官二員乘驛而往將西海諸台吉所有

羅卜臧賽音台吉子女人畜盡行收來使之完  
聚目前時序未宜令暫查明造冊賁送如無食  
則支寧夏倉所貯之米每口給米五倉斗如無  
馬匹難以遷移則轉檄甘肅巡撫扣數給與馬  
匹酌量授地暫行安插目前交與寧夏總兵及  
地方官照料至來年草青時應於何地安插另  
行請

旨



命下之日臣衙門檄知甘肅巡撫寧夏總兵官可也  
隨遣內閣侍讀海三岱遷羅卜臧賽音台吉暫  
駐寧夏邊外至是理藩院奏據海三岱報稱羅  
卜臧賽音台吉已安插寧夏邊外每口給倉米  
五斗矣復稱羅卜臧賽音台吉牲畜已盡無力  
前來應臣衙門遣官一員將羅卜臧賽音台吉  
及其子女屬裔給驛自寧夏送至鄂爾多斯自  
鄂爾多斯驛送歸化城附近安插俟羅卜臧賽

音台吉到日再議授職

上從之

癸卯

免厄魯特台吉祁齊克等死令與巴圖爾額爾克濟  
農完聚提督孫思克疏言據總兵官潘育龍報  
稱台吉憨都既與巴圖爾額爾克濟農一同來  
降又與羅卜臧額林臣祁齊克等潛謀逃亡欲  
赴策旺阿喇布灘所已發官兵追勦之矣臣按

慙都等蒙古狼子野心叛服靡常潛謀逃遁今  
官兵追至庫勒圖地方慙都雖遠遁已殺其部  
落四十餘人擒其男婦大小一百二十人獲其  
馬駝一百二十餘匹足以振

國威而懲諸彝矣但祁齊克一人自稱台吉同謀  
逃遁理合正法至陣擒四十三人隨祁齊克之  
九人亦應正法然此輩俱係奴僕其主欲逃不  
得不從之而去罪雖當死情似可原應否寬宥

及蒙古妻子應否解京處置所獲馬駝牛器械等物應否賞給有功官役謹奏以

聞部議祁齊克宜正法宥其從人妻子解京其駝馬等物賞給有功將士奏入

上寬祁齊克死免妻子解京令與巴圖爾額爾克濟農完聚餘如議

七月壬戌筆帖式常壽等報伊拉古克三庫圖克圖逃遁先是伊拉古克三庫圖克圖請自察

罕托會遷其父吳巴什及弟子往居宋拉布貝  
勒地方

上不許令遷歸化城尋伊拉古克三以其父病故奏請  
安葬

上立限期遣理藩院筆帖式常壽偕往遷其弟子至是  
常壽報云五月初八日同伊拉古克三至察罕  
托會地方問伊拉古克三曰爾弟子何日發往  
歸化城對云我以父歿奏

上蒙給三月假來時須一月住時須一月歸時須一月  
今未及二十日行期如何可定至一月後復促  
其速遣諸弟子起行伊拉古克三曰今欲從鄂  
爾多斯而往則自此渡黃河必需十日行路需  
半月及渡歸化城黃河渡口又需三四日且既  
渡黃河鄂爾多斯之地又無水草故不便從鄂  
爾多斯而行我等若渡黃河岔則兩三日內可  
以畢渡沿黃河涯而去水草又佳一月內可抵

歸化城我將率弟子於是月十二日起行常壽  
親視伊拉古克三及其弟子渡黃河岔畢謂之  
曰取我坐馬來與爾偕行伊拉古克三曰不便  
同往此路無蒙古部落雖有喀爾喀而無驛站  
我弟子亦無餘騎汝自從鄂爾多斯而往可也  
七月初十間當與我會於歸化城常壽再四索  
馬竟不之與又不便擅取馬於鄂爾多斯而與  
伊拉古克三偕行不得已來至鄂爾多斯六月

二十六日到歸化城欲於七月初十日往迎伊  
拉古克三初九日有賚喀爾喀善巴王印文而  
來者乃伊拉古克三弟子吳巴什也據言伊拉  
古克三身率諸弟子北去我則逃回常壽即赴  
善巴王所探其虛實又據王善巴報文云伊拉  
古克三奔走之人吳巴什六月二十九日來此  
隨已遣行外仍急遣章京多爾濟諭察罕托會  
之鄂爾多斯白蘇特喀喇城諾顏博貝等云此



事果實爾等當隨踪往追如往投噶爾丹則我等當從古爾班賽罕往覓其踪吾身亦起行往追之矣理藩院據報入奏得

旨常壽著逮問伊拉古克三弟子及屬下人留之無益可令查其徒衆隨彼去踪遣之著大學士等會議具奏隨議筆帖式常壽乃特遣與伊拉古克三同往同來者也見彼屢次推辭不來之狀不即以情形報部目覩其渡河而自回歸化城應將

常壽革去筆帖式交刑部從重議處至伊拉古  
克三

皇上授以總領喇嘛班第之職泰養已深理宜効力圖  
報而竟逃歸大干法紀或逃往達賴喇嘛處或  
逃往西海處俱未可定應檄甘肅提督孫思克  
詳探如遇彼逃去即行拿解如或抗拒即行剿  
殺併西海諸台吉亦應遣文諭之至伊拉古克  
三既逃京城有從厄魯特攜來格隆五人班第

五人平人四人幼童二人婦女一人俱應隨彼去踪遣出境外再遣官一員往查歸化城中有從厄魯特攜來格隆班第平人亦照此例遣出境外伊拉古克三所收

京城歸化城旗下人及喀爾喀人等爲格隆班第者俱交墨爾根綽爾濟安插寺廟平人各歸原主

京城及歸化城中所有伊拉古克三家產牲畜什

物入官交內務府

上從之後筆帖式常壽擬絞監候

已已

命喀爾喀格楚兒喀屯附於鑲黃蒙古旗下格楚兒  
喀屯以屬裔來歸

上曰格楚兒喀屯既有屬裔佐領著居口外應附何旗  
安插兵部議奏隨議查上三旗遊牧地方察哈爾  
內鑲黃旗蒙古人丁缺額應將格楚兒喀屯及

其兩孫並屬裔一佐領附於鑲黃蒙古旗下臣  
部遣官往遷俟到日交該旗安插至格楚兒喀  
屯屬裔有佐領官阿南達驍騎校扎木巴拉另  
戶蒙古壯丁八十六名家下蒙古壯丁四十三  
名應將一百二十九丁編為一佐領此佐領內  
已有舊管官員不必再設其護軍校前鋒護軍  
驍騎俱照察哈爾例補充

上從之

八月戊戌以江寧將軍博濟調補西安將軍時  
西安將軍馬拉病歿故有是

命

九月戊申提督孫思克奏報員外郎馬迪等爲  
噶爾丹屬下蒙古所害孫思克疏言

欽差員外郎馬迪既至甘州言迪奉

命往使於策旺阿拉卜灘如提鎮標下守備千把等  
官有願隨行者許迪攜之而往其兵丁亦令酌

量帶去臣即與馬迪議撥臣標兵十名肅州鎮標及各路兵二十名臣與肅州總兵官潘育龍遊守千把等官共捐助每人馬各二匹駝各一頭并給食物其願隨行者有臣標中營守備高天福肅州總兵官標下右營千總馬惟恒撥隨馬迪出嘉峪關而去今據肅州總兵官潘育龍呈稱鄉導蒙古巴素隨馬迪前去今歸報云馬迪諸人行至哈密地方距城五六里許駐劄有

噶爾丹屬下蒙古五百忽攘臂殺馬廸及筆帖式諸人盡劫馬駝行李而去執原任郎中格什守備高天福千總馬惟恒併受傷未受傷兵共二十四人到哈密城未知存亡據報以

聞

辛酉

命遣兵備大同先是撥每佐領鎗手護軍各一名前鋒親軍護軍各十名漢軍火器營兵二千給與



修整器械銀各十兩左翼撥都統阿什坦宗室  
公華善護軍統領噶爾馬副都統噶爾璧碩代  
納親方格火器營撥都統鄂倫代副都統孫徵  
灝右翼撥都統巴渾德希福護軍統領蘇丹副  
都統鄂克濟哈趙山達寧阿龍什庫火器營撥  
都統諾邁副都統李林隆前鋒撥統領碩鼐在  
京預備至是

上諭大學士伊桑阿阿蘭泰等曰著將現備兵內每佐

領撥護軍七名前鋒四百名火器營一半於十月  
下旬遣往大同養馬整備應遣大臣兵部奏聞除  
隨駕護軍一名及京城備兵之事亦著議奏議曰  
遣往大同預備之兵除前所撥預備兵內隨

駕從圍每佐領下護軍一名所餘護軍七名俱令遣往  
每旗應遣護軍叅領五員每叅領下遣護軍校  
五員前鋒四百每旗或前鋒叅領或前鋒侍衛  
各一員前鋒校各三員火器營兵一千每翼或

協領或叅領各二員每旗章京各三員驍騎校各三員此軍於十月下旬發行起行日期交欽天監選擇此軍係在口內養馬駐備其行糧草料交戶部照例給發至京城所備現剩前鋒四百名每佐領下撥親軍各一名鎗手護軍各一名驍騎各二名火器營一千名於此再增撥每佐領下護軍各二名預備此項增發護軍人等亦照賞銀十兩所備之礮及因礮所撥都統副

都統官兵包衣官兵依舊預備既增發護軍各  
二名則每旗應增撥護軍叅領各一員每叅領  
下撥護軍校各二員所備大臣內應遣何人往  
備大同應撥何人預備京城伏候

上裁得

旨著都統希福阿什坦護軍統領蘇丹副都統噶爾  
璧鄂克濟哈趙山方格火器營都統諾邁副都統  
孫徵灝去以希福為將軍授之勅印以護軍統領

噶爾馬為前鋒統領遣之前去留前鋒統領碩鼐  
於預備軍中餘如議尋兵部以遣往大同兵所撥  
大臣內應以何人為叅贊奏請

上命都統諾邁護軍統領噶爾馬蘇丹為叅贊

乙丑

命酌減備兵時噶爾丹遣使額爾德尼綽爾濟等奉  
表請

安入貢

上諭大學士伊桑阿阿蘭泰等曰覽噶爾丹奏詞語恭順並無不軌之意詢諸來使亦無他故今備兵而無所用似乎徒勞士卒然噶爾丹非可信之人如不之備萬一有事又貽後悔應備與否爾等與議政諸臣會議具奏議噶爾丹斷乎不來然備兵不過略費錢糧並無所勞苦也如有警息自此出兵較自大同前行甚便且所備之兵俱已賞給銀兩此軍似仍預備大同爲宜至目下並無實

音則京城前所預備之兵仍應預備後增撥護軍二名應請停止奏入得

旨遣備大同每佐領護軍七名內減去一名留於京城預備兵內後增撥護軍二名著停止

戊辰

勅諭噶爾丹及達賴喇嘛時噶爾丹疏言前爲折卜尊丹巴土謝圖汗之故陳奏三言乞以一言爲定初意即欲往請

宏仁發回七旗於故土止因地方既遠糧騎不足且  
我未歸之前凡所留輜重俱被策旺阿喇卜灘  
劫去諸物無存今惟恃達賴喇嘛之恩得以安  
集謹將我從前遲久之處遣使陳奏請

勅裁斷奏至

賜噶爾丹達賴喇嘛勅

勅諭噶爾丹曰朕撫馭天下惟欲率土無事各享安  
樂原不欲興戎耀武荼毒生民今爾疏稱爲折卜



尊丹巴土謝圖汗之故上奏三言乞以一言爲定  
併請發回七旗於故土前者爾喀爾喀厄魯特交  
惡相攻朕念兩國皆奉貢之邦不忍坐視黎民塗  
炭遣使於達賴喇嘛令屢諭爾等和好爾不奉朕  
旨及達賴喇嘛之言戕伐喀爾喀七旗喀爾喀人  
等紛紛離散各無衣食皆來歸朕求生然爾違朕  
之旨朕並未嘗以介意乃爾復以追喀爾喀爲名  
深入我邊徼直至烏闌布通地方及發兵問故爾

兵輒先攘臂我軍始與之戰爾大敗窘迫跪於威  
靈佛前誓不犯中華皇帝屬下喀爾喀以及衆民  
印文誓書現在且濟隆庫圖克圖亦在及伊拉古  
克三庫圖克圖往爾處爾頂禮達賴喇嘛所遺佛  
像而設誓曰我斷不違旨矣前者深入邊境已自  
知罪佛在此而敢不以我罪爲罪乎聖上即佛天  
也乞姑宥我所奏亦甚明朕以爾言爲信遂止各  
路軍馬不使窮追此亦爾所灼知也喀爾喀人等

窘迫來歸若不收養則皆至死地是以朕親出閱  
安插近邊給糧米畜產以活之今尚窮困未甦死  
亡殆盡或一旗僅存數人喀爾喀並無糧畜如遣  
回故土誰養之乎且喀爾喀人等肯明知饑餓而  
歸死乎前以養喀爾喀之故曾勅達賴喇嘛遣諭  
爾等達賴喇嘛亦甚喜奏言喀爾喀如此窮餓博  
施惠養與佛慈悲同行聞之不勝懽忭博碩克圖  
原當從濟隆之言而竟不從大君宜責而誅之乃

俯憐衆生有如赤子復垂恩宥今以其疏發汝汝其視之若達賴喇嘛致書於爾或有異言爾亦陳奏可也前聞策旺喇卜灘與汝不睦流言未審虛實是以遣學士達虎等往問策旺喇卜灘請朕加恩故遣員外馬廸等往頒恩賜並不欲敗汝事而遣之也所差馬廸既爲爾之人所害勅書現在爾所爾視之自不謬也今嘉峪關報稱馬廸同行之人名巴素者歸告曰我等八月十一日行至哈密

有厄魯特噶爾丹屬下圖克齊哈什哈哈爾海達  
顏額爾克兩人爲首率兵五百許奪去員外馬廸  
等馬駝行李戕害員外郎馬廸及筆帖式撥什庫  
等其他兵卒亦有被掠者亦有留於哈密者從來  
爭戰之國無害往來使人之理烏闌布通地方爾  
雖與我軍拒戰然前所遣使人察罕古英寨桑阿  
卜都賴額爾克寨桑等千有餘人俱遣大臣送出  
境外歸還於汝果宜加害則爾目下所遣使人朕

即不許歸何不可乎爾前所奏言朕許以折卜尊  
丹巴土謝圖汗畀汝此小人欲自脫其身而有此  
言耳果有此旨豈不早諭汝乎況執來降之人以  
畀讐人有是理乎前亦嘗以此諭汝矣今爾背棄  
誓言索我降人喀爾喀害我奉差策旺喇卜灘之  
使臣馬廸諸人以此觀之是爾陽奉達賴喇嘛之  
言而陰違達賴喇嘛之命全棄誓言生事起釁彰  
彰明矣達賴喇嘛曾令汝犯我使臣索我降人乎

況喀爾喀人等朕已養之數年方且俟其生聚將  
擇可居之地安插之爾如此背誓生事本應不納  
爾使逐之歸去但念爾使皆係小人必至困迫是  
以放入仍使貢獻市易今將爾背誓及爾人害我  
使臣之事詳開勅中發爾使沙哈孫巴克綽爾般  
下賚往其餘俟市易畢遣歸其即查明害我使臣  
之事及汝欲陳之言具疏與現在羈留之人一併  
奏遣朕當熟籌一策焉以上情事已頒諭達賴喇

嘛矣

勅諭達賴喇嘛曰朕奉承

天命統馭萬邦惟以人民得所爲至願是以率土有邦無  
不恪恭來享亦無不遵朕詔旨爾喇嘛領奉佛法  
濟度衆生西域蒙古亦尊奉爾喇嘛之教朕與爾  
道法本一心志亦同是以喀爾喀厄魯特之事朕  
多與爾喇嘛商畫前聞厄魯特喀爾喀交惡相攻  
朕遣使於爾喇嘛欲與汝共息其爭使相和好爾



即欣然發使同往噶爾丹所不啻三四矣噶爾丹  
竟不遵我諭和之旨而破喀爾喀以致喀爾喀窮  
極流亡無衣無食匍匐歸朕以求活然朕猶未嘗  
因拒命之故有惡於噶爾丹其後噶爾丹復借追  
喀爾喀爲名深入我邊境直至烏闌布通及發兵  
問故噶爾丹兵又先犯我顏行我軍始與之戰噶  
爾丹大敗不得已跪誓於威靈佛前謂永不犯中  
華皇帝屬下喀爾喀以及衆民誓書印文具在見

証濟隆庫圖克圖亦在迨伊拉古克三庫圖克圖  
前往噶爾丹頂禮爾喇嘛所遺佛像而誓曰我斷  
不復違旨矣深入邊界實我之罪佛在此敢不自  
服乎聖上即佛天也乞終宥我所奏甚明朕以噶  
爾丹誓言爲信止各路軍馬不使窮追此亦噶爾  
丹之所明知也以勅諭爾喇嘛不啻數次矣喀爾  
喀人等困極來歸若不收養則皆死亡是以朕親  
出閱安插近邊給糧畜以養之今尚窮困未甦僅

有七旗之名死亡殆盡有一旗僅存數人者喀爾喀並無騎無糧倘遣歸故土其誰養之豈有明知饑餓而肯就死地者乎前以賑濟喀爾喀之故曾勅諭爾喇嘛亦遣諭噶爾丹爾喇嘛亦甚喜言喀爾喀如彼窮餓全而活之真佛之慈悲也聞之不勝懼怖博碩克圖原應從濟隆之言而竟不從大君宜責而誅之乃俯恤衆生有如赤子仍加恩宥汝奏尚在今噶爾丹違棄誓言云爲折卜尊丹巴

土謝圖汗之故上奏三言乞以一言爲定發回七  
旗於故土又前聞策旺喇卜灘與噶爾丹不睦流  
傳之言未審虛實故遣學士達虎等往問其故策  
旺喇卜灘請朕加恩勿絕乃遣員外馬廸等往頒  
恩賜並非欲敗噶爾丹之事也今嘉峪關報有員  
外郎馬廸同行之人名巴素者歸告曰我等八月  
十一日至哈密有厄魯特噶爾丹屬下圖克齊哈  
什哈哈爾海達顏額爾克兩人爲首率兵五百許

奪員外郎馬廸之馬駝行李器械戕害員外郎馬  
廸及筆帖式撥什庫等其他入等亦有被擒者亦  
有留於哈密者從來戰爭之國無害往來使人之  
理烏闌布通地方噶爾丹雖與我軍拒戰而噶爾  
丹所遣使人察罕古英寨桑阿卜都賴額爾克寨  
桑等千有餘人俱命大臣送之出境遣歸噶爾丹  
且喀爾喀人等朕方欲養之數年待其生聚擇可  
居之地安插之噶爾丹背棄誓言奏索我措置已

畢之折卜尊丹巴土謝圖汗又將遣往策旺喇卜  
灘之使臣戕害以此觀之誠反覆奸頑之徒也已  
將彼罪備開勅內付其貢使賚往令彼覆奏噶爾  
丹陽奉爾言肆爲欺罔陰則不從爾言不奉爾教  
生事妄行彰彰明甚不知爾意以爲何如今以噶  
爾丹生事朕秣馬勵兵治具已畢俟噶爾丹回奏  
以決一策特以此故命伊什格隆賚勅諭汝知之

十月辛卯

諭大同暫停備兵

上諭大學士伊桑阿等曰近欲發兵備大同但天時寒冷若竟無事則士卒徒勞倘不加預備萬一有警又恐不及朕意欲暫停發兵至大同以現在京城餵養之馬駝驅往大同飼秣如有當行之事立發京城所備之兵星馳而往即乘所飼之馬似於事無悞爾等可集議具奏隨議奏言

上諭極當應暫停發兵往備大同查大同現有積貯之

糧請以每佐領所餵駱駝一頭馬六匹再增馬  
四匹共得一萬二千有餘但在大同一處牧養  
恐不能容查宣府亦有米糧應將馬駝分五旗  
於大同分三旗於宣府交直撫晉撫撥賢能道  
府分附近州縣餵養勿致瘡斃如豆不足以米  
代之其解送此馬駝者每佐領下派撥什庫驍  
騎每叅領下派章京每旗派叅領按旗起程解  
往更撥戶兵兩部司官將馬駝面交地方官餵



養此馬駝於途中每站支空草一束餵之凡餵此馬駝者照京城餵養之法自初餵日起每馬駝給料八倉升草七觔兩月滿後減二升再餵一月後又減二升至來年三月再奏請

旨奏入

上是其議著將每佐領現養駱駝一頭馬六匹發往宣府大同餵養所增馬四匹令於京城餵養暫停發兵往備大同

乙未

命罷備巴圖爾額爾克濟農之兵先是以備巴圖爾  
額爾克濟農之故撥鄂爾多斯六旗吳喇忒三  
旗喀爾喀七旗共四千五百名兵各在本地預  
備至是理藩院奏言今巴圖爾額爾克濟農業  
已歸誠向所備兵伏乞罷之

上曰可罷備兵令吉爾他布等遠展哨汛以探聲息

十一月丁卯發

勅諭噶爾丹時噶爾丹之使額爾德尼綽爾濟色卜  
登額爾克白等挾噶爾丹書劄散布內屬蒙古  
上聞之乃發

勅諭噶爾丹

勅曰朕統御萬邦惟願天下之民共享昇平無生事  
無作亂兼容并包誠心撫恤殘刻之事素所不爲  
諸國遠人誠能恭順職貢不改其常朕益加愛惜  
施恩不絕若陽奉陰違狡詐百出者朕未嘗不知

亦不究竟每從寬教戒冀其改悔自新是以中外  
之人無不歸誠向化雖極隱密之事必來奏聞無  
敢欺蔽今爾所遣奉貢使人持爾書來與朕屬下  
蒙古告以爾語皆以奏聞於朕朕盡知之矣此等  
譎詐祇自欺取禍而已何能欺人且朕屬下蒙古  
皆世受豢養厚恩豈能負朕而墮汝計乎據爾書  
云爲宗喀巴之法而行朕不得不將護持宗喀巴  
之法爲之宣布本朝龍興之際與達賴喇嘛道一

風同延召達賴喇嘛至京此天下之所共知也康熙八年達賴喇嘛疏稱前蒙皇上惠賜臣勅印仗一統大君之仁慈平治土伯特國三部落而紅帽帕克木取兩族之人而去請將伊等還歸於噶爾馬朕即降旨特遣官取紅帽帕克木發還康熙十三年達賴喇嘛疏稱巴忒馬三寶瓦巴克什之經請勅諭中國僧俗勿得誦習朕即降勅禁止僧俗概不許誦習康熙十八年達賴喇嘛疏稱自聖主

三朝以來道一風同謹將平治漢人土伯特蒙古之要略奏請睿覽其奏尚在累代以來宗喀巴之法達賴喇嘛之教與朕相符是以朕此地所行皆宗喀巴之法達賴喇嘛之教喇嘛班第所服皆黃帽所誦皆達賴喇嘛之經朕之敬禮若是爾喀爾喀厄魯特未必如朕之敬禮宗喀巴之法與達賴喇嘛之教也且達賴喇嘛洞見朕護持宗喀巴黃帽之法而深相信服故凡事直陳無隱朕亦以蒙

古諸事與之共決歷年通使不絕於此可以知朕  
與達賴喇嘛道法合久矣爾喀爾喀厄魯特之  
人陽則誑言爲宗喀巴之法達賴喇嘛之教而行  
陰則違之率土皆知爾前者敗於烏闌布通之時  
爾屬下人皆驚懼而謗汝俱請降朕朕素無離間  
害人之意是以准爾誓書訓爾等以依常安處勿  
懷異心此伊拉古克三庫圖克圖所深知也至於  
策旺喇卜灘雖聞與汝不協朕但恤其貧苦加之

以恩而已未有使與汝惡之意此皆至實之情朕  
思爾斷無此等譎詐之事必爾下人及爾使人欺  
爾而離間之耳然若輩如此行事豈使汝善全之  
意乎爾當熟計之朕凡有所聞見即與宣說向無  
隱諱特開始末降勅諭爾知之此

勅交與來使賚往

戊辰烏喇佐領畢立克圖以噶爾丹使人所授  
書出首先是噶爾丹於烏闌布通之地爲我軍



所擊走內大臣蘇爾達與土謝圖親王沙津達  
爾漢親王班第等共商遣阿喇善下人俄齊爾  
等令止噶爾丹於是衆皆疑科爾沁以爲已附  
噶爾丹矣將軍薩卜素傳郭爾羅斯吳爾圖納  
蘇圖台吉之言亦疑科爾沁密奏其有異心

上以科爾沁臣服已久斷無此意略不之疑至是烏喇  
佐領畢立克圖往厄魯特館中遇噶爾丹使人  
濟爾哈郎格隆見之問爾爲誰畢立克圖曰吾

乃科爾沁台吉濟爾哈郎格隆又問曰爾識土  
謝圖王否畢立克圖曰我係土謝圖王親信之  
人濟爾哈郎格隆遂延畢立克圖入其廬飲之  
酒使誓於佛前出書一封授之令致土謝圖王  
復贈畢立克圖貂皮一張猩猩氈一件畢立克  
圖以其事密首

上取其書留中不令宣露

甲戌

授提督孫思克振武將軍時孫思克以軍政自陳

上曰孫思克自簡用提督以來克副委任和輯兵民殫心籌畫久鎮巖疆勞績懋著深爲可嘉著加授將軍彈壓地方以示朕獎勵勞臣之意尋授振武將軍

十二月壬寅發官兵駐防右衛

上以西北有警前命戶部尚書馬齊兵部尚書索諾和往勘歸化城駐兵之地至是馬齊等奏言臣等往

歸化城時恭請

訓旨奉

命將內外地方加意詳勘臣等欽遵至大同見所屬  
右衛地方離殺虎口十七里殺虎口離歸化城  
一百八十里右衛與歸化城相近移右衛人民  
出城外令住郭內城中蓋造房屋可以駐兵口  
外迤北五十里東西五十里內所有熟荒地畝  
近者給兵遠者給大臣官員歸化城小地荒田

鹵難以耕種歸化城西南三十四里外則爲渾  
津村村南十里外有渾津巴兒哈孫舊城基址  
城北有大土爾根河向西而流四圍三里餘宜  
展此城將北面從河邊向南二十丈爲城北址  
一面三里築土爲城造房駐劄官兵城之四圍  
所有田地可取以給官兵耕種奏入

命議政諸臣議議曰歸化城之渾津巴兒哈孫無城  
右衛現有城且近歸化城大宜駐兵其往駐時

應撥每佐領護軍三名驍騎三名漢軍火器營  
兵一千駐劄撥發時有父子兄弟爲親軍前鋒  
情願往駐者則令本佐領內護軍驍騎更代遣  
往統以將軍一員每翼護軍統領各一員滿洲  
副都統各一員漢軍副都統各一員每旗協領  
各一員佐領各七員拖沙喇哈番等官各七員  
驍騎校各七員其協領以實授叅領遣往護軍  
每旗以實授護軍叅領各四員護軍校各七員

漢軍一千名以每翼協領各一員每旗佐領各二員拖沙喇哈番等官各二員驍騎校各二員令其約束每佐領撥撥什庫六名護軍撥什庫驍騎仍照京城例給以錢糧駐兵既發之後按缺補足其喀爾喀阿爾薩蘭帶青等人丁共二千八百九十七名三丁合披一甲可得甲九百六十五名以五十名爲一佐領共計編成十九佐領蒿齊忒郡王達爾馬吉里第旗下兵丁四

百六十一名亦以三丁合披一甲共甲一百五十四名編爲三佐領所餘人丁作爲附丁此所編佐領中選擇材幹善於約束之台吉頭目授以佐領驍騎校附歸化城土默特兩旗在歸化城四圍游牧再撥綠旗馬兵一千步兵二千駐劄設總兵官一員標下立爲五營每營設遊擊一員守備一員千總二員把總四員其總兵官候



上簡授遊擊以下官員聽總兵官選品缺相當者具奏  
兵丁於本地召募此綠旗兵駐劄之地衙署房  
屋器械糧餉草料等項俟滿兵往駐之日再議  
如有事當行此新設總兵官及宣大兩鎮標下  
官兵俱聽將軍調遣將軍以下佐領以上大小  
官員口糧及馬之草料一槩停給以口外五十  
里以內荒地給之自力開墾至護軍校驍騎校  
及兵丁俱給以田或僕從鮮少難以力耕則護

軍校驍騎校兵丁停給給以口糧草料夏秋停給草料令在口外牧放至所給拖沙喇哈番等官之田撥遣大臣官員至殺虎口外開墾耕種右衛城內所有民房俱給價購買安插官兵其房屋不足令該撫擇賢能官於城內照數增造給之所需錢糧俱動支正項造房工畢再發官兵往駐奏入

上曰城內居民若令移於郭外必致困苦可勿令遷移

照常居住若造官兵房屋城內難容即於城外建造此軍有事即行不必授田大臣官員亦宜給與口糧馬給草料若動支錢糧建造官兵房屋必致累民亦不得速竣應照湖灘河朔運米例捐造著再議隨議此項駐劄官兵應給以口糧及馬匹冬春二季草料夏秋停給草料令其牧放其口糧草料一半折給一半本色但大同府一年所徵本色米撥給本地綠旗兵所餘無幾應停徵地

丁銀改徵本色米豆草束以給官兵一半之本  
色官兵所住房屋間數應視荊州例給之城內  
民居不必遷移官兵住房城內不敷則於城外  
建造綠旗官兵住房亦令建造此項建造房屋  
俱令捐助餘如前議

上曰右衛駐劄滿兵原爲遇有機會即時遣發故滿兵  
務使勢力有餘至於綠旗官兵遇調用則宣大綠  
旗兵在近調發甚便停其添設其缺以滿洲官兵

增駐可也所發護軍之缺應即補足代充驍騎火  
器營兵之缺應行停止官兵住房止交捐助者蓋  
造斷不堅固宜仍撥往駐大臣官員監修仍著覆  
議議應停增設綠旗官兵其缺於前發每佐領護  
軍三名再增護軍三名驍騎三名再增驍騎一  
名計每佐領兵爲十名使之往駐其護軍每旗  
發實授護軍叅領七員內以一員爲夸蘭大設  
護軍校十四員以領之駐兵既撥之後其護軍

之缺補足驍騎火器營兵之缺不必補足造房  
之時撥工部堂官一員駐防大臣內每翼一員  
每旗護軍叅領一員滿洲蒙古章京各一員每  
翼漢軍章京各一員監造得

旨每佐領減去護軍一名驍騎一名餘如議隨授都  
統希福爲建威將軍噶爾馬爲左翼護軍統領  
四格爲右翼護軍統領方格爲左翼副都統馬  
七爲右翼副都統張素義爲左翼漢軍副都統

吳興祚爲右翼漢軍副都統令駐右衛

甲辰以羣疑科爾沁密奏情事開誠

面諭時各部落諸王台吉以元旦來朝

上召集科爾沁諸王台吉

諭土謝圖親王沙津等曰昔烏闌布通之役內大臣

蘇爾達及爾等共商遣爾屬下人俄齊爾等於噶

爾丹衆皆疑爾等已附噶爾丹矣將軍薩卜素等

亦皆疑之曾密奏以爲爾等有異心後又有烏喇

佐領畢立克圖以噶爾丹遺爾等之書密首朕思  
爾科爾沁自

太祖

太宗時歸附世世職貢相爲媼親歷有年所爾等斷無此  
意朕略無所疑果有可疑亦不如是顯然宣諭爾  
等矣

明諭之頃沙津免冠叩首奏曰衆皆疑我科爾沁有  
異心既有密奏而畢立克圖又舉首噶爾丹之



書蒙

皇上仁恕略不疑我科爾沁反顯然

明諭臣亦何所措詞但效死以圖報

聖恩之高厚而已且內大臣蘇爾達原欲差臣之人於

噶爾丹臣不之從蘇爾達遂與達爾漢親王班

第及臣公同商議差阿喇善之人俄齊爾臣等

世蒙

聖上寵遇優隆臣等豈有萌此意之理其科爾沁衆台

吉亦皆歡忭叩首奏曰謂科爾沁俱附噶爾丹  
則臣等亦皆在其中矣若非

聖上洞鑒此情則臣等寃抑何能自白臣等實無此意

聖祖仁皇帝親征平定朔漠方略卷十二